

PEMBERITAHU PERTANYAAN

DEWAN RAKYAT, MALAYSIA

PERTANYAAN : LISAN
DARIPADA : DR. ISMAIL BIN DAUT
KAWASAN : MERBOK
TARIKH BAHAS : 17.05.2016
NO. SOALAN : 41

Y.B. DR. ISMAIL BIN DAUT minta **MENTERI PERDAGANGAN ANTARABANGSA DAN INDUSTRI** menyatakan kesan kejatuhan nilai matawang Ringgit Malaysia terhadap pelaburan asing dalam negara dan langkah-langkah yang diambil Kementerian dalam memastikan pelaburan asing terus kukuh.

Jawapan:

Tuan Yang Dipertua,

Kejatuhan nilai Ringgit pada tahun 2015 dilihat sebagai tidak menjejaskan keyakinan pelabur asing untuk terus melabur di Malaysia. Menurut statistik imbangan pembayaran yang dikeluarkan oleh Jabatan Perangkaan, Malaysia telah berjaya merekodkan jumlah aliran masuk bersih pelaburan langsung asing (FDI) sebanyak RM39.5 bilion pada tahun 2015. Ini merupakan peningkatan sebanyak 11.8%, berbanding jumlah yang dicatatkan pada tahun 2014, iaitu sebanyak RM35.3 bilion.

Bagi tempoh tersebut, pecahan jumlah pengaliran masuk bersih pelaburan langsung asing adalah seperti berikut:

- Pembuatan sebanyak RM17.7 bilion;
- Perkhidmatan sebanyak RM7.8 bilion;
- Perlombongan sebanyak RM12.9 bilion;
- Pembinaan sebanyak RM1.1 bilion; dan
- Pertanian, perhutanan dan perikanan sebanyak RM16 juta.

Keyakinan pelabur asing turut terbukti apabila mereka meningkatkan pegangan dalam pasaran kewangan negara,

meskipun Ringgit menghadapi tekanan dan ekonomi dunia dibelenggu kebimbangan berikutan prospek kenaikan kadar faedah di Amerika Syarikat dan kelembapan ekonomi di China. Pada akhir tahun 2015, pegangan pemilik-pemilik asing dalam sekuriti hutang dan sukuk negara adalah sebanyak RM214.8 bilion. Ini merupakan peningkatan sebanyak hampir RM17 bilion, berbanding RM197.8 bilion pada akhir bulan Ogos 2015.

Data tersebut jelas menunjukkan bahawa meskipun persekitaran ekonomi pada ketika ini agak mencabar, Malaysia terus kekal kukuh sebagai sebuah destinasi pelaburan pilihan bagi pelaburan asing.

Tuan Yang Dipertua,

Kerajaan sememangnya prihatin bahawa kejatuhan nilai Ringgit telah menimbulkan kekhawatiran di kalangan pengilang-pengilang yang perlu mengimport jentera dan peralatan, bahan gunahabis serta bahan mentah untuk proses pengeluaran mereka. Kejatuhan nilai Ringgit ini akan menyebabkan peningkatan terhadap kos input bagi pengilang-pengilang tersebut.

Antara langkah-langkah yang sedang diambil Kementerian untuk mengekalkan daya saing pelaburan, dengan mengeksploitasi nilai Ringgit yang di bawah paras sebenar adalah:

- (i) Menggalakkan pengilang-pengilang menggunakan keluaran tempatan sebagai input supaya mendapat pulangan yang lebih tinggi dengan kos pengeluaran dalam matawang Ringgit yang rendah. Pengilang-pengilang tempatan juga akan mendapat faedah apabila mereka mengeksport keluaran siap kerana harga yang ditawarkan lebih kompetitif;
- (ii) Menggalakkan pelabur asing untuk meningkatkan pelaburan mereka di Malaysia dalam projek pelaburan yang berkualiti seperti projek-projek berteknologi tinggi, nilai ditambah yang tinggi, berintensif pengetahuan dan kemahiran, berorientasi eksport, berintensif modal, reka bentuk dan R&D, projek-projek yang mempunyai impak yang tinggi dan mempunyai hubungan yang kukuh dengan industri tempatan;

- (iii) Membangunkan rantaian bekalan dengan melengkapkan hubungan rantaian industri sama ada industri huluan sedia ada dan industri hiliran yang baharu. Antara langkah-langkah Kerajaan untuk mencapai hasrat ini adalah dengan penganjuran beberapa sesi persidangan pembekal-pembekal industri atau *suppliers' conferences*, dengan izin dan juga menganjurkan program-program pembangunan vendor. Langkah-langkah ini juga dapat membantu pelabur-pelabur asing dalam *business matching*, dengan izin, untuk memulakan projek usahasama dengan pelabur tempatan atau untuk melaksanakan pengilangan kontrak atau *contract manufacturing* dengan izin;
- (iv) Menganjurkan misi-misi pelaburan ke luar negara terutamanya yang dianjurkan oleh agensi di bawah Kementerian Perdagangan Antarabangsa dan Industri, iaitu Lembaga Pembangunan Pelaburan Malaysia (MIDA) untuk mempromosi dan menarik pelaburan baharu; dan
- (v) Menganjurkan program "*media engagement*", dengan izin, dan publisiti di dalam dan luar negara bagi menyalurkan maklumat-maklumat terkini berkaitan pelaburan kepada pelabur-pelabur yang berpotensi.

Tuan Yang Dipertua,

Usaha-usaha berterusan Kerajaan untuk memastikan Malaysia sebagai destinasi pelaburan yang diyakini dan mempunyai persekitaran perniagaan yang kondusif sememangnya turut diiktiraf di peringkat antarabangsa.

Antaranya, dalam Laporan Menjalankan Perniagaan 2016 Bank Dunia, Malaysia telah mengekalkan kedudukan ke-18 sebagai negara paling berdaya saing di kalangan 189 negara, walaupun ketika negara lain terpaksa bergelut dengan tekanan ketidaktentuan ekonomi global.

Laporan tersebut meletakkan Malaysia mendahului Switzerland (26), Perancis (27), Belanda (28), Jepun (34), Emiriyah Arab Bersatu (31), Thailand (49), China (84) dan India (130), manakala di dalam ASEAN, Malaysia menduduki tempat kedua, di belakang Singapura.

Kerajaan akan meneruskan pelaksanaan inisiatif-inisiatif yang bersesuaian untuk terus meningkatkan kemasukan pelaburan termasuk pelaburan asing ke Malaysia, dan seterusnya mencapai

sasaran pelaburan tahunan sebanyak RM291 bilion di bawah Rancangan Malaysia Kesebelas.